

- प्रदेश मांय नगरीय निकाय चुनाव सारू नामपाना पाछा लेवण रो काल आखिरी दिन—सियासी हलचल बधी—भारतीय जनता पार्टी चुनाव घोषणा पत्र जारी कीनो।
- नमो भारत रेल कॉरिडोर परियोजना रा तैत बावल—बहरोड़ खंड रा काम माथे विचार सारू आज जयपुर मांय मीटिंग राख्यी ज्यी।
- केन्द्रीय वन मंत्री भूपेन्द्र यादव इंसान रा कुदरत सागे तालमेल माथे ज़ोर दीनो।
- प्रदेश रा 693 बंधा मांय हाल ताई बूता रो 58 फीसदी पाणी— लारला साल री इण ई भियाद रे मुकाबले करीब एक चौथाई कम।

000

प्रदेश मांय नगरीय निकाय चुनाव सारू नाम पाछा लेवण रो काल आखिरी दिन है। ई पाछे राज्य निर्वाचन आयोग री ओर ऊं उम्मीदवारां ने चुनाव चिन्ह दिया जावेला। नामपाना री काल व्ही जांच पाछे 10 हजार 245 वार्ड सारू हाल ताई 57 हजार 939 उम्मीदवार चुनाव मैदान मांय है। ई बीचे उम्मीदवार जनसम्पर्क मांय लाग्योडा है। खास सियासी पार्टियां सागे केई ठौड़ां दूजा उम्मीदवार ई मुकाबला ने रोचक बणा रह्या है, जदके न्यारी—न्यारी ठौड़ां निर्दलीय उम्मीदवार ई भाग आजमा रह्या है। ई बीचे भारतीय जनता पार्टी री ओर ऊं आज संकल्प पत्र जारी करी ज्यो। प्रदेश भाजपा अध्यक्ष मदन राठौड़, मुख्यमंत्री भजनलाल शर्मा अर दूजा आला नेतावां री मौजूदगी मांय जयपुर मांय जारी करी ज्या संकल्प पत्र ने नगरीय संकल्प पत्र रो नाम दियो ज्यो है। ई मौके मुख्यमंत्री सरकार री उपलब्धियां रो जिकर कीनो। वे कह्यो के पार्टी सगळा 309 नगरीय निकायां रा सुनियोजित विकास रा आयाम बणाया है अर इण ई सोच सागे आगे ई काम कर्यो जावेला। श्री शर्मा वन स्टेट—वन इलेक्शन री सोच माथे ज़ोर देता थकां कह्यो के इण ऊं टैम अर धन दोन्यू री बचत व्हेला। चुनावी हलचल बीचे सियासी आरोप—प्रत्यारोप रो सिलसिलो ई सरू व्हे ग्यो है। विधानसभा मांय विपक्ष रा नेता टीकाराम जूली नगरीय निकाय चुनाव मांय सत्ता पख माथे प्रशासन रा बेजा इस्तेमाल रो आरोप मांड्यो। प्रदेश कांग्रेस अध्यक्ष गोविंद सिंह डोटासरा सरकार रा विकास रा आंकड़ां ने कागजी बताया। ई बीचे नगरीय निकाय चुनाव ने स्वतंत्र, निपख अर साफगोई सागे करावण सारू न्यारी—न्यारी व्यवस्थावां तैय करी जा रही है। चुनाव मांय काम ली जावण वाळी ई.वी.एम. रो रेंडमाइजेशन कर्यो जा रह्यो है। निकाय चुनाव मांय जनता री बत्ती ऊं बत्ती भागीदारी तैय करण सारू जाग जगावण रा कार्यक्रम ई राख्या जा रह्या है। मानव श्रृंखला, पोस्टर, रंगोली अर भांत—भांत रा कार्यक्रमों रे जरिए लोकतंत्र रा पर्व मांय भागीदारी जरूर करण रो संदेश दियो जा रह्यो है। स्वीप रा तैत आज बीकानेर मांय ट्रांसजेंडर समुदाय ने वोट देवण रा महत्त्व रा बारा मांय जाणकारी दीरीजी।

000

प्रदेश मांय निकाय चुनाव आदर्श आचार संहिता रा तैत गैर—कानूनी तौर ऊं शराब बणावण अर लावण—ले—जावण री रोकथाम सारू लगातार कार्यवाही करी जा रही है। आबकारी आयुक्त नमित मेहता बतायो के ई सारू नाकाबंदी, गश्त अर दबिश री कार्यवाहियां करी जा रही है। वे बतायो के जयपुर रा आदर्श नगर हलका मांय एक मकान माथे दबिश दे र हरियाणा मांय बणी शराब बरामद कर र एक जणा ने गिरफ्तार करी ज्यो। हनुमानगढ़ जिला रा सूरेवाला अर पन्नीवाली मांय शराब बणावण री भट्टियां अर मोटी तादाद मांय वॉश नष्ट करायी ज्यी। पाली जिला रा सोजत मांय आर.पी.एफ. री टीम एक रेलगाड़ी ऊं शराब री 50 ऊं बत्ती बोतलां जब्त कीनी।

000

नमो भारत रेल कॉरिडोर परियोजना रा तैत बावल—बहरोड़ सेक्शन ऊं जुड़या काम रो जायजो लेवण सारू आज जयपुर मांय मुख्य सचिव वी. श्रीनिवास अहलकारां सागे मीटिंग कीनी। इण मांय दिल्ली—गुरुग्राम— रेवाड़ी—अलवर रीजनल रैपिड ट्रांजिट सिस्टम कॉरिडोर रा ई खण्ड री विगतवार परियोजना रपट माथे चर्चा करीजी। मुख्य सचिव बतायो के करीब 129 किलोमीटर लम्बी ई परियोजना रो 25 किलोमीटर हिस्सा राजस्थान मांय व्हेर निकळेला। इण मांय शाहजहांपुर—नीमराणा—बहरोड़, समेत चार एलिवेटेड टेशन प्रस्तावित है।

000

राष्ट्रीय पोषण सप्ताह रा तैत प्रदेश मांय न्यारा—न्यारा कार्यक्रमों रे जरिए संतुलित आहार अर पौष्टिक खान—पान रा महत्त्व री जाणकारी दी जा रही है। राष्ट्रीय पोषण सप्ताह रो ई साल रो मुद्दो **पोषण की शक्ति की खोज करें** राख्यी ज्यो है। जयपुर री पोषण अर खान—पान विशेषज्ञ डॉ. मेधावी गौतम बतायो के मौसमी फल अर सब्जियां ने खाण—पीण मांय रोजीना शामिल कर्या जावणा चाहिजे।

000

प्रधानमंत्री नरेन्द्र मोदी रो आज नई दिल्ली मांय जल शक्ति मंत्रालय रा दो दिन रा विभागीय सम्मेलन रा समापन सत्र ने संबोधित करण रो कार्यक्रम है। जल शक्ति मंत्री सी.आर. पाटिल काल ई सम्मेलन रो उद्घाटन कीनो हो। मंत्रालय रा ई पहला विभागीय शिखर सम्मेलन मांय पाणी बचावण अर इण रा बेहतर प्रबंधन सारू विचार करी ज्यो। सम्मेलन मांय न्यारा—न्यारा राज्यां री बेहतर जल प्रबंधन नीतियां री जाणकारी ई दीरीजी।

केन्द्रीय पर्यावरण, वन अर जलवायु परिवर्तन मंत्री भूपेंद्र यादव कह्यो है के कुदरत सागे तालमेल ने ईको सिस्टम ने बचावण री बुनियाद बणायी जावणी चाहिजे। श्री यादव आज नई दिल्ली मांय दो दिन री अंतर्राष्ट्रीय कार्यशाला रा उद्घाटन सत्र मांय बोल रह्या हा। **‘बाघ परिदृश्य : आजीविका और आय सृजन के लिए संरक्षण, जैव-अर्थव्यवस्था और इको-टूरिज्म के आधार’** मुद्दा माथे आ कार्यशाला इंटरनेशनल बिग कैट अलायंस-आईबीसीए, एशियाई विकास बैंक-एडीबी अर राष्ट्रीय बाघ संरक्षण प्राधिकरण री ओर ऊं राखी ज्यी है। ई मौके श्री यादव कह्यो के बाघां रा हलका खास कुदरती पूंजी है।

000

करौली जिला रा श्रीमहावीर जी हलका मांय आज एक मोटरसाइकिल रे बस री फेंट मांय आ जावण ऊं मोटरसाइकिल सवार एक जोड़ा अर एक और जणा री मौके ई मौत व्हे ग्यी। दूजी कानी जयपुर रा नाहरगढ़ बायोलॉजिकल पार्क मांय बाघ रा हमला रे कारण आज एक लुगाई मजूर री मौत व्हे ग्यी। जमवारामगढ़ हलका री आ लुगाई ई पार्क मांय चारो काटबा गयी ही जठे बाघ वां माथे औचक ई हमलो कर दीनो। हादसा पाछे रीस्योड़ा लोग नाहरगढ़ बायोलॉजिकल पार्क मांय भेळा व्हे ग्या। वे बाघ रा पिंजरा रो दरुजो खुल्यो व्हेवण रो आरोप मांड्यो। आमेर रा विधायक प्रशांत शर्मा मौके पूग र लोगां ऊं समझाइश कीनी। कोटपूतली-बहरोड़ जिला रा जयसिंहपुरा गांव मांय करंट लाग जावण ऊं एक जणा री मौत व्हे ग्यी अर दो जणा घणा झुलस ग्या। झुलस्योडा लोगां ने बी.डी.एम. जिला अस्पताल पूगायी ज्या, जठे ऊं वां ने जयपुर रैफर कर दिया ज्या।

000

राज्य मांय लारला कुछ दिनां ऊं चौमासा री मंदी पड़ी बिरखा रे ओजू जोर पकड़बा रा आसार है। देश रा ऊगणी हलका माथे बण्या मौसम तंत्र रा असर ऊं आवता एक सप्ताह ताई राज्य रा केई जिलां मांय बरसात री संभावना है। जयपुर अर भरतपुर संभाग रा कुछ हलकां मांय आज बारिश रो नुवो दौर सुरू व्हेवण रा आसार है। मौसम विभाग काल जयपुर, अलवर, बारां अर झालावाड़ समेत 17 जिलां सारु बरसात रो येलो अलर्ट जारी कीनो है। ई सागे ई 4 ऊं 7 सितम्बर बीचे, कोटा, अजमेर अर उदयपुर संभाग मांय ई गरज सागे हल्की ऊं मझला दर्जा री बारिश री संभावना है। ई दौरान कोटा संभाग मांय भारी बारिश सारु चेतायी ज्यो है, हालांकि राज्य रा आतूणी हलकां मांय चौमासा री बिरखा मंदी रेहवण री शंका है। ई बीचे प्रदेश रा 693 बंधां मांय बूता रो करीब 58 फीसदी पाणी है, जो लारला साल री इण ई मियाद रे मुकाबले करीब एक चौथाई कम है।

000

प्रदेश मांय ई साल हाल ताई व्ही कम बिरखा ने ध्यान राखता थकां सूखा री शंका मांय मुख्य सचिव वी. श्रीनिवास आपदा राहत माथे ध्यान देवण रा हुकम दीना है। वे आज जयपुर मांय संबंधित संयुक्त शासन सचिवां ने सूचना प्रबंधन ऊं जुड़्या कामां माथे खास ध्यान देवण सारु कह्यो। मुख्य सचिव सूखा रा असर वाळी शंका रा हलका अर लोगां ने टेमसर साता देवण सारु आपदा प्रबंधन अर सूखा रो सामो करण री तैयारियां तैय करण सारु कह्यो। ध्यानजोग है के ई चौमासा मांय हाल ताई डीग अर फलौदी दो ही जिलां मांय सामान्य ऊं बत्तो मेह बरस्यो, जदके 21 जिलां मांय सामान्य ऊं कम बिरखा व्ही।

000

प्रदेश मांय 4 सितम्बर ने मनाया जावण वाळा भगवान श्रीकृष्ण रा जन्म री आठम्-जन्माष्टमी रो पर्व सारु मंदिरां मांय सोहवणी झांकियां सजाई जा रही है। राजधानी जयपुर रा गोविंद देवजी मिन्दर समेत न्यारी-न्यारी ठौड़ा 4 सितम्बर ने मुख्य दर्शन अर रात्रि पूजन रा कार्यक्रम राख्या जावेला। जन्माष्टमी रे मौके शोभायात्रावां ई निकाळी जावेला अर मेळा भरेला। दूजी कानी 13 सितम्बर ऊं सुरू व्हेवण वाळा बाबा रामदेव रा भादवा मेळा री ई जोर-शोर ऊं तैयारियां करी जा रही है। उत्तर पश्चिम रेलवे री ओर ऊं हनुमानगढ़ जिला रा गोगामेड़ी मांय भरण वाळा मेळा ने ध्यान राखता थकां मेला स्पेशल गाड़ियां चलायी जा रही है।

000